

ՀԻՆ ՀԱՅԱՍՏԱՆԻ «ՇԻՆԱԿԱՆ» ԴԱՍԻ
ՍՈՑԻԱԼԱԿԱՆ ԴՐՈՒԹՅԱՆ ՄԱՍԻՆ

Պրոֆ. Ս. Ս. ՄԱՐԿՈՍՅԱՆ,

Պրոֆ. Ս. Ս. Հակոբյանի «Հայ գյուղացիության հողին ամրացման և ճորտացման հարցի շուրջը» ուշադրավ հողվածում («Պատմա-բանասիրական հանդես», 1963 թ., № 1) հեղինակը քննության է առնում հին և միջնադարյան Հայաստանի «շինական» դասի վերաբերյալ գոյություն ունեցող կարծիքները: Հողվածի ծավալի սահմանափակությունը հեղինակին, հարկավ, չէր կարող հնարավորություն ընձեռել՝ հանդամանորեն քննության առնելու «պատմական հարուստ անցյալ ունեցող» այդ պրորլեմի վերաբերյալ գոյություն ունեցող ամբողջ դրականությունը: Սակայն պրոֆ. Ս. Ս. Հակոբյանի հողվածի արժանիքը մենք համարում ենք այն, որ նա, առաջ քաշելով այդ հարցը, հստակորեն պարզարանում է իր տեսակետը, որը հիմնական դժերով հակադրվում է գոյություն ունեցող և տարածված կարծիքին:

Մենք, հիմնականում համակարծիք լինելով պրոֆ. Հակոբյանի հետ, անհրաժեշտ ենք համարում քննության առնել միայն ակադեմիկոս Հ. Մանանդյանի մեկնարանությունները տվյալ հարցի՝ Հին Հայաստանի շինական դասի սոցիալական դրության վերաբերյալ:

Ակադ. Հ. Մանանդյանը միանգամայն իրավացիորեն «շինականների սոցիալական դրության պրորլեմը» մեր պատմության համար «չատ կարևոր խնդիր» է համարում: «Շինական դասի սոցիալական-տնտեսական վիճակը Հին Հայաստանում,—գրում է նա,—հայոց ներքին կյանքի ամենադժվար ուսումնասիրելի խնդիրներից մեկն է»¹: Եվ Մանանդյանը բազմիցս անդրադարձել է այդ դժվարին խնդրի լուսարանմանը. «Դիտողություններ Հին Հայաստանի շինականների դրության մասին մարդպանության շրջանում» (ՀՍԽՀ Պետական համալսարանի տեղեկագիր, 1925, № 1), «Հայաստանի արքունի հարկերը մարդպանության շրջանում» (Տեղեկ. դիտ. և արվեստ. ինստ., 1926, № 1), «Заметки о феоде и феодальной войске Парфии и Аршакидской Армении», 1932, «Ֆեոդալիզմը Հին Հայաստանում», 1934, «Քննական տեսություն հայ ժողովրդի պատմության», հատ. Բ, մաս Ա, 1952):

Գլուխ խոնարհելով մեր անվանի գիտնականի հմտության և քրտնաջան աշխատանքի առաջ, այնուամենայնիվ մենք հավակնում ենք մեր համեստ ուժերի սահմաններում քննության առնել, թե ակադ. Հ. Մանանդյանին հաջողվե՞լ է արդյոք լիովին պարզարանել այդ դժվարին խնդիրը:

«Մատենադրական աղբյուրները,—գրում է ակադ. Հ. Մանանդյանը,—դժբախտաբար, հնարավորություն չեն տալիս քննության առնելու և լուսարա-

¹ Տե՛ս Հ. Մանանդյան, Ֆեոդալիզմը Հին Հայաստանում, Երևան, 1934, էջ 143:

նկու այդ (շինականների սոցիալական դրության վերաբերյալ—Ս. Մ.) խրնդիրը հանգամանորեն, իր բոլոր մանրամասնություններով... Աղբյուրների մեջ կան միայն կողմնակի մի քանի ցուցումներ, որոնցից, իմ կարծիքով, կարելի է հետևել, որ նախարարական Հայաստանում ևս շինականները դտնվել են, րնդհանուր առմամբ, ճորտանման վիճակում²։

Բնչպես հայտնի է, մարքսիզմի կլասիկները ֆեոդալական արտադրահարաբերությունների պայմաններում իրարից տարրերում են երեք կարգի դյուղացիություն՝ ճորտ, կախյալ և ազատ³։

Արդ, նախարարական Հայաստանի շինականներն իրենց սոցիալական դրությունում, Մանանդյանի կարծիքով, ֆեոդալական դյուղացիության ու կարգին էին պատկանում։ Մեզ թվում է, որ ակադ. Մանանդյանը հենց այդ հիմնական հարցում լավ չի կողմնորոշվում։ Նրա պատկերացրած հին Հայաստանի շինականներ մի կողմից ճորտ է բառիս իսկական իմաստով, բանի ու «շինականները համարվել են կալվածատեր ազնվականության հատուկ դույքը» և «կարելի է հավանական համարել, որ շինականները պետք է լինեին ճորտացած և կալված հողին»⁴։ Այսպիսով, ըստ ակադ. Մանանդյանի, նախարարական Հայաստանի շինականները ճորտեր էին արդի դիտական բմբռնումով։ Մյուս կողմից, մեր պատմաբանը համոզիչ կերպով ցույց է տալիս, որ «Շահապիվանի ժողովի կանոններից երևում է, որ շինականներն ունեցել են իրենց հատուկ դույքը, որ նրանք իրավունք են ունեցել տալ իրենց զավակներին կամ թողնել ժառանգորեն»։ «Դվինի ժողովի կանոններում կա մի հետաքրքիր վկայություն, որից կարելի է եզրակացնել, որ շինականները կարող էին գնել անշարժ գույք», նրանք «ունեցել են քսակագին հողեր»։ Շինականները ենթակա չեն եղել իրենց հողատերերի դատական ու ոստիկանական հսկողությանը, այլ «իրավունք են ունեցել հայց տալու և դատվելու եկեղեցական դատարաններում։ Հավանական է, որ նրանք նույն իրավունքն ունեցել են նաև աշխարհիկ դատարաններում։ Նրանք կարող էին ամուսնանալ առանց կալվածատիրոջ համաձայնության»։ Վերջապես, «շինականների դրությունը տուգանքների տեսակետից մոտավորապես հավասար է եղել անգլիական ազատ դյուղացիության դրությանը և երկու անգամ ավելի նպաստավոր է եղել, քան ռուսական սմերդներինը (այսինքն՝ նույնպես ազատ դյուղացիներին—Ս. Մ.)։ Ավելին, Մանանդյանը այն կարծիքին է, թե «Հին Հայաստանում դյուղություն են ունեցել համայնական հողատիրության որոշ կարգեր և հավասար հողարածանումն ըստ մարդավի», որ «շինականներն ուշադրության են առնվել երբեմն ֆեոդալական Հայաստանի քաղաքական կենցաղում»։

Ակադ. Հ. Մանանդյանը փաստական նյութի հետազոտության ընթացքում գալով այն եզրակացության, որ հին Հայաստանի շինականները մի կողմից համարվում էին կալվածատեր ազնվականության դույքը և ամրացված էին հողին, իսկ մյուս կողմից անձնապես ազատ էին, եզրակացնում է, որ հին Հայաստանի շինականները ոչ թե «ստրկանման ճորտեր» էին, այլ բյուզանդական կոլոնների նման «կախյալ ճորտեր», կամ «կիսազատ ճորտեր»։ Այդ տեսակետը նա անց է կացնում իր բոլոր աշխատություններում և ամենից

² Հ. Մանանդյան, Քննական տեսություն հայ ժողովրդի պատմության, հատ. Բ, մաս Ա, 1952, էջ 360։

³ К. Маркс и Ф. Энгельс, Соч., т. XV, էջ 441։

⁴ Հ. Մանանդյան, Քննական տեսություն..., հատ. Բ, մաս Ա, էջ 357։

հակիրճ ձևակերպում է այսպես՝ «Երևող հասարակական դրոշմամբ բոլորից ցածր կանգնած էին «չինական»-ներ կոչվող հողին ամրացված կախյալ գյուղացիները, որոնք... անձնապես ազատ էին և շատ կոզմերով հիշեցնում էին բյուզանդական կոյուններին»⁵։

Ծիշտն ասած, չնայած ակադ. Մանանդյանը վկայակոչում է բյուզանդական կոյուններին, ուսումնական ЗАВИСИМЫЕ և գերմանական Hölrigge գյուղացիներին, մենք դժվարանում ենք ֆեոդալիզմի արտադրահարաբերությունների պայմաններում պատկերացնել գյուղացիների մի կատեգորիա, որը միաժամանակ և՛ կալվածատիրոջ գույքն էր, և՛ անձնապես ազատ շինական էր։ Մեր կարծիքով, այդ երկու դրոշմներն անհարիր են, մեկի առկայությունը բացասում է մյուսի ներկայությունը։

Բայց մյուս կողմից ակադ. Մանանդյանն այնպիսի խոշոր գիտնական է, որ նա չի կարող այդպիսի ծանրակշիռ խոսք ասել առանց իր տեսակետը սկզբնաղբյուրներից վերցրած փաստերով հիմնավորելու։ Ուստի մենք անհրաժեշտ ենք համարում մեկ առ մեկ ըննության առնել նրա կողմից բերվող փաստերը, տեսնելու համար թե արդյո՞ք բերված փաստերից անառարկելիորեն բխում է նրա այդ տեսակետը։

2

Ակադ. Մանանդյանը հենվում է Դվինի ժողովի 9-րդ կանոնի վրա, որտեղ ասված է՝ «Ճորժամ ազատը գիրեանց զերդ և զմարդ բաժանեն՝ յուրվը շարակնութեամբ առնեն, զժառանգաւորս եկեղեցւոյ ջանան ի ծառայութիւն և ի ստրկութիւն արկանել, մոլեալք և մոլորեալք ի քրիստոնէական հաւատոյս...»⁶։

Մեզ զբաղեցնող հարցի կապակցությամբ այս վկայության մեջ երկու կետ կա. 1) ազատներն իրենց գույքը բաժանելիս՝ բաժանում էին երդերն ու մարդկանց. 2) նրանք աշխատում էին հոգևորականներին ծառա և ստրուկ դարձնել։

Միանգամայն իրավացի է պատմաբանը, երբ ասում է, թե «Դվրնի այդ կանոնից պարզ երևում է, որ երդերն ու մարդիկ եղել են ժառանգական բաժանման առարկա»։ Ընթերցելով էսան այն, որ «հավանական է ենթադրել, որ նույն այդ զույգը (այսինքն՝ այն, ինչ որ բաժանման առարկա էր ծառայում -- Ս. Ս.) կարելի է եղել նաև գնել, վաճառել, ընծայել, կտակել և այլն»։ Բայց դրանից բոլորովին չի բխում, թե մարդկանց ու երդերի բաժանումը և գույքի օտարման իրավունքը վերաբերում է շինականների անձնավորությանը։ Միայն այդ դեպքում ակադ. Մանանդյանն իրավունք կունենար եզրակացնելու, որ շինականները համարվում էին ազնվականների գույքը և ճորտացած ու կապված էին հողին։

Մեզ միանգամայն բանական է թվում Մանանդյանի այն կարծիքը, որ հայ ֆեոդալներն այդ ժամանակ սեփական խոշոր տնտեսություն չէին վարում և նրանց եկամուտի գլխավոր աղբյուրը շինականներից զանձվող հարկերն ու տուրքերն էին։ Մյուս կողմից, ինչպես ակադ. Մանանդյանի, այնպես էլ ն. Ադոնցի կարծիքով, ֆեոդալների սեփականությունը կազմող հողերը

⁵ Проф. Я. А. Манандян, Заметки о феоде и феодальном воиске Парфин и Аршакидской Армении, 1932, էջ 81։

⁶ Հ. Մանանդյան, Ֆեոդալիզմը հին Հայաստանում, էջ 161—162։

ժառանգաբար գտնվում էին գյուղական համայնքների տրամադրության տակ, և հողի բաժանումը շինականների միջև տեղի էր ունենում անկախ ֆեոդալից՝ համայնական կանոնների համաձայն թրստ մարդաթվի և հավասար»։ Այդ երկու գիտնականների տարաձայնությունը գյուղացիական հողաբաժիններն արտահայտող տերմինի մասին է։ Մանանդյանի կարծիքով, այդ հողաբաժիններն արտահայտվում էին «վիճակ» տերմինով, իսկ Ադոնցի կարծիքով՝ «կալված»։ Այս հեղինակների մեկնաբանությունից պետք է եզրակացնել, որ հողի օգտագործման իրավունքը պատկանում էր համայնքին, իսկ ֆեոդալներն այդ հողերի վրա ունեցած տիրակալման իրավունքի (ИРАВА ВЛАДЕНИЯ) հիման վրա զանձում էին հողի ունեւան։ Այստեղից էլ կարելի է եզրակացնել, որ համատիրակալների միջև երդերի և մարդկանց բաժանումը, հավանաբար, կարող էր նշանակել զանձվող ունեւայի բաժանում։ Հակառակ պարագայում կստացվի, որ համայնական գյուղն իր շինականներով և հանդերով բաժանվում էր տարբեր տիրակալների միջև։ Այս դեպքում ոչ միայն մի համայնքը վեր է ածվում մի քանի համայնքների, այլև անհավանական է դառնում հողերի թրստ մարդաթվի և հավասար բաժանումը։ Իացի այդ 'Իվինի ժողովի այդ նույն հողվածի շարունակության մեջ ասված է. «Արդ՝ եթե ոք ազահոթեան ակամբ հայեսցի և զազատ մանկուս եկեղեցւոյ ի բաժին և ի վիճակ ծառայութեան արկեցեն, այնպիսիքն ի սուրբ Լուսաւորչի օրհնութենէն և ի մերմէ ժողովոյս հեռի եղիցին և մի եղիցի իշխանութիւն վարդապետի և քահանայից զայնպիսեաց պատարագն օրհնելու»։ Եթե հողվածի առաջին մասում սոսկ փաստի արձանագրումն է, ապա այս երկրորդ մասում՝ որոշումն է։ Եվ ըստ էության նույն միտքն է արտահայտված, ինչ որ առաջին մասում, այսինքն՝ նույն իմաստը կրկնված է այլ բառերով։ Ամենայն վստահությամբ կարելի է հավասարության նշան դնել հետևյալ դարձվածքների միջև.

յուրով շարակնութեամբ առնեն— եթե ոք ազահոթեան ակամբ հայեսցի—
զժառանգաւորս եկեղեցւոյ— զազատ մանկունս եկեղեցւոյ.
ի ծառայութիւն արկանել ի վիճակ ծառայութեան արկեցեն։

Հողվածի առաջին մասից բացատրության կարոտ է մնում «ի ստրկություն արկանել» հասկացողությունը, որին կանդրադառնանք ստորև։ Իսկ առ այժմ անհրաժեշտ ենք համարում ընդգծել, որ «զազատ մանկունս եկեղեցւոյ» հակադրություն է «վիճակ ծառայության» հասկացողության։ Մենք ենթադրում ենք, որ «վիճակ ծառայության» և «ի հարկի ծառայություն» նույն հասկացողություններն են։ Իսկ հենց իրեն՝ ակադ. Մանանդյանի ասելով «ի հարկի ծառայութեան... սոցիալական-տնտեսական հիմքը կազմել է հարկատվությունը, որից ազատ են եղել ազնվական արտոնյալ դասերը»։

«Թագ. Ավդալբեգյանը,— գրում է Մանանդյանը,— իր «Հաս, սակ ու բաժ» աշխատության մեջ մատնացույց է անում, որ «զերդ և զմարդ» բաժանելը սովորական երևույթ է նաև այժմյան Պարսկաստանում, սակայն գյուղացիք այնտեղ հարկատու են, բայց ճորտ չեն։ Այս առարկությունն, իմ կարծիքով, համոզիչ չէ, որովհետև վերոհիշյալ կանոնում ակնարկվում է նաև շինականների «ստրկության» դրությունը»։

7 Նույն տեղում, էջ 142—143։

8 Նույն տեղում, էջ 155։

9 Նույն տեղում, էջ 162։

Եթե տվյալ կոնտեքստում «ծառայություն» և «ստրկություն» տերմիններին հաղորդենք նույն բովանդակությունը և այդ բառերը հոմանիշ համարենք, որ այլ պարադայում բոլորովին անհավանական չէ, ապա ակադ. Մանանդյանի կզրակացությունը թվում է տրամաբանական: Բայց նախ՝ համոզեցուցի՞ր չէ, որ այդ տերմիններով նկատի են առնված հատկապես շինականները, քանի որ այդտեղ շինականների մասին որևէ ակնարկ չկա, խոսքը հոգևորականներին «ծառա» և «ստրուկ» դարձնելու ապօրինի ձգտման մասին է: Եթե հարցին ձևականորեն մոտենալու լինենք, ապա նույնքան իրավամբ կարող ենք եզրակացնել, որ «աղատները» ձգտում էին եկեղեցական դասի ներկայացուցիչներին ոչ թե ճորտ, այլ ստրուկ դարձնել արդի դիտական իմաստով:

Ղազար Փարպեցին վկայում է, թե «պարեղոտաւորք ազատեալ են ի քրիստոս», ինքը Մանանդյանը պատմական տվյալների հիման վրա գտնում է, որ «հոգևորական դասի մեջ ժառանգական է եղել քահանայական պաշտոնը»¹⁰, ուրեմն՝ առկա է եղել որոշ կաստայականություն: «Հոգևորականությունը դասված է եղել ազնվականների շարքում և իր ապահարկությամբ հավասարված է համարվել «ազատ»-ների դասին»¹¹: Հետևաբար, եթե ազատները ձգտում էին հոգևորականներին «ի ծառայություն արկանել», այդ այլ բան չէր նշանակի, քան վերացնել նրանց ապահարկության արտոնությունը և ոչ թե ամրացնել հողին՝ ճորտացնել: Ինչ վերաբերում է «ի ստրկություն արկանել» արտահայտությանը, ապա մեր կարծիքով, այդտեղ առկա է ոչ թե ուղղակի իմաստ. այլ փոխաբերական, այն է՝ «ազատ»-ները ջանում էին հոգևորականներին իրենց ենթարկել, մի հանգամանք, որ նրանք համազոր էին համարում ստրկացման, այլ կերպ ասած՝ «ի ստրկություն արկանել» արտահայտությունը սոսկ պատկերավոր արտահայտություն է և ոչ թե բառացի ստրկացում:

Վերևում մենք աշխատեցինք ցույց տալ, որ երդերի և մարդկանց բաժանման մասին նրա մեկնաբանությունը հազիվ թե հնարավոր լինի ընդունելի համարել: Ըսկ այս վերջին վկայությունն առանձին վերցրած՝ շինականների իրավական դրության մասին ոչինչ չի ասում:

3

Շինականների հողին ամրացած լինելու վերաբերյալ իր տեսակետը հիմնավորելու համար ակադ. Մանանդյանը վկայակոչում է Աբրահամ Խոստովանոզի և Խորեն Երեցի մասին Փարպեցու տված տեղեկությունները և զրտնում է, որ շինականներն «ըստ երևույթին, ժառանգաբար կապված են եղել իրենց զբաղմունքին, հողին և հարկատու դրությանը»: Եվ իսկապես, նրա այդ եզրակացությունը տրամաբանորեն բխում է այն մեկնաբանությունից, որ նա տալիս է Փարպեցու համապատասխան հատվածներում արտահայտված «ի հարկի» և «մշակութիւն» տերմիններին: Սակայն մեղ թվում է, այդ կոնտեքստում հիշյալ տերմինների բովանդակությունը բոլորովին այլ բան է: Այդ վկայություններից մեկը հետևյալն է. «Կտրեալ ղերկոցուց զականջսն՝ ետուն տանել յԱսորեստան, ի գաւառն որ անուանեալ կոչի Շափուլ, կալ անդ նոցա ի հարկի և առնել մշակութիւն արքունի»¹²: Այսպիսով, Հազկերտ II-ը

¹⁰ Հ. Մանանդյան, Քննական տեսություն հայ ժողովրդի պատմության, հատ. Բ, մաս Ա, էջ 362:

¹¹ Նույն տեղում, էջ 346:

¹² Նույն տեղում, էջ 158:

հրամայում է, որ Արրահամ խոստովանողը և խորեն երեցր հրաժարվեն քրիստոնեությունից և կրակապաշտություն ընդունեն: Երբ նրանք հրաժարվում են կատարել այդ հրամանը, թաղավորը կտրել է տալիս նրանց տկանջները և արսորում է Շափուլ գավառը «կալ ի հարկի և առնել մշակութուն արքունի»¹³։ Հետագայում Արրահամ խոստովանողը տեղական քրիստոնյաների օգնությամբ փրկագնվում է: Ակադ. Մանանդյանը, բերելով երեք միանման հատվածներ, հզրակացնում է՝ «Փարպեցու վկայության բովանդակությունից երևում է, որ «արքունի մշակը» անվան տակ կարելի է հասկանալ արքունի գյուղացիներին, որոնց գլխավոր պարտականությունը եղել է «ի հարկի ծառայությունը»: Մեկ թվում է, որ ակադ. Մանանդյանի այս կոահումը միանգամայն անհամոզեցուցիչ է: Շատ տարօրինակ է, որ պետականորեն սլատոված մարդիկ հավասարեցվում են արքունի գյուղացիներին և նրանց պատմից բխող սահմանափակումները տարածվում են շինական դասի վրա: Որովհետև Արրահամ խոստովանողը փրկագնվել է, «կարելի է, ուրեմն, ենթադրել,— գրում է Մանանդյանը,— որ արքունի գյուղացիներին թույլատրված է եղել հարկային պարտականությունների ապագնումը», հետևաբար, «շինականները... իրավունք չեն ունեցել ինքնակամ կերպով թողնել այդ ծառայությունը և, ըստ երևույթին, ժառանգաբար կապված են եղել իրենց զբաղմունքներին, հողին և հարկատու դրությամբ»¹⁴: Եթե ակադ. Մանանդյանի այս դիտողությունները տրամաբանորեն զարգացնենք, ապա չի կարելի չհանգել այն հզրակացության, որ եթե էրոք արքունի գյուղացիներին թույլատրված է եղել փրկագնվել («ապագնվել»), այդ ինքնին նշանակում է, որ լայնատանում եղել է շինականներից տարբեր գյուղացիական մի դաս, որը ժառանգաբար կապված չի եղել իր զբաղմունքին, հողին և հարկատու դրությանը: Հարց է առաջանում, ինչպե՞ս է կոչվել գյուղացիության այդ հատվածը, որի մեջ, բնականաբար, պետք է ընդգրկվեին փրկագնված շինականները: Որքան հայտնի է, մեր պատմական դրականության մեջ այդպիսի անուն չի հայտարարված, բացի Փափստոսի մի անգամ հիշատակված «կարճագատները», որի էությունը մինչև այժմ մնում է անհղծվածային:

Ակադ. Մանանդյանի այդ եզրակացության համար հիմնական կուլան է ծառայում «ի հարկի» արտահայտությունը, որը նա մեկնաբանում է «ի հարկի ծառայություն» կամ պարզապես՝ հարկատվություն: Բայց բանն այն է, որ հայերեն հարկ բառն ունի ուսումնական ինչպես налог, подать, այնպես էլ при-нуждение բառի իմաստը: Օրինակ, հարկադրական աշխատանք նշանակում է ոչ թե հարկ տալու աշխատանք, այլ բռնադատված աշխատանք: Այդ պատճառով էլ ինչպես Բացատրական, այնպես էլ Առձևոն բառարաններում հաճախ բացատրված է որպես տուրք, պարտադիր ծառայություն, բռնադատություն: Ուստի, եթե նկատի ունենանք Փարպեցու վկայության բովանդակությունը (այն, որ խոսքը վերաբերում է պետականորեն պատժված և աքսորված մարդկանց), ապա այդ կոնտեքստում «պատուհաս կրեսցեն խեղությունը, և հրթնալ յԱսորեստան մշակութուն արասցեն ընդ արքունի մշակսն, և ի հարկի կայցեն մինչև ցլախճան իւրեանց» հատվածը այլ բան չի կարող նշանակել, քան հարկադրական աշխատանք կատարել «աքսորված հատուկ մի խմբի հետ» և ոչ թե արքունի շինականների հետ աշխատել և հարկ վճարել:

¹³ Նույն տեղում, էջ 159:

Այս ամենից, հավանաբար, պետք է հղրակացնել, որ Փարպեցու՝ «Իսկ երանելի երէցն Աբրահամ երաշխաւորութեամբ հաւատացելոց աշխարհին, որք գտունս իւրեանց և զարարս փոխանակ ընդ հարկի նորա զրեցին յարքունիս զվախճան նորա, և կատարեցին զկարգեալսն անվեհեր յաղագս նորա»¹⁴ վկայութիւնը պետք է հասկանալ ոչ թէ ցմահ հարկատւութիւնից ազատադրում, ինչպես կարծում է Մանանդյանը, այլ ցմահ պատժից՝ հարկադրական-տաժանակիր աշխատանքից: Մեր եզրակացութեան համար կռվան կարող է ծառայել այդ հարցի վերաբերյալ Եղիշեի պատմածը: 1) Եղիշեն գրում է՝ «Ծհան ի նմին քաղաքէ ասորեստանեայս քրիստոնեայս արս հինգ... Կտրեաց զնոսա ունշս և զականջս, և ետ տանել յԱսորեստան, զի կայցեն ի մշակութեան արքունի»¹⁵: Բնական է, որ նրանց ուղարկում էին ոչ թէ իրենց ծննդավայրը, այլ Ասորիքում գոյութիւն ունեցող պատմի վայրը, որտեղ նրանք մշակութիւն պետք է անեին. անհավանական է, որ այդ միջավայրը լինէր «արքունի գյուղացիներին» միջավայր, ինչպես կարծում է Մանանդյանը: 2) Խորենի և Աբրահամի մասին Եղիշեն գրում է, որ նրանց ականջները կտրելուց հետո հրահանգվեց՝ «Երթալ ձեզ յԱսորեստան, և լինել ձեզ մշակ յարքունիս...»: Ինչպես տեսնում ենք, այստեղ ասված է նույնը, ինչ որ ասում է Փարպեցին, բայց բացակայում է վերջինիս «և ի հարկի կայցեն մինչև ցմահ իւրեանց»: Իսկ Եղիշեն մի քանի տող ներքև գրում է, որ նրանք «էին յարքունի պատուհասի»¹⁶, սրանից մենք եզրակացնում ենք, որ այդ էլ հենց նշանակում էր «ի հարկի կայցեն», այսինքն՝ խոսքը հարկադրական աշխատանքի մասին է: 3) Ինչպես երևում է Եղիշեի պատմածից, նրանց նկատմամբ սկզբնական որոշումը որոշ չափով մեղմացվեց, քանի որ արքունի ժամանակ զինվորներին հրահանգվեց՝ «միայն աստի դուք առէք զնացէք, և հասեալ յԱսորեստան՝ ուր կամ իւրեանց է և շրջեսցին»¹⁷, այլ կերպ ասած, եթէ այսօրվա ձեռք արտահայտվելու լինենք, նրանք ազատ արքունի ենթարկվեցին և Ասորիքում այստեղ և զաղտ մեծապէս ընկալելու եղեն ի բնակչաց աշխարհին¹⁸: Նրանք ազատ շրջում էին երկրում և հավատացյալներից տարեցտարի դրամ էին ժողովում և օգնում էին իրենց հայրենակից կալանավորներին: Բնականաբար, նրանք ոչ միայն շինականների շարքում չէին, այլև «մշակութիւն» չէին անում: Հետևաբար, եթէ տեղական հավատակիցների օժանդակութեամբ Աբրահամը փրկագնվեց, ապա ոչ թէ շինականութիւնից փրկագնվեց, այլ այսօրվա լեզվով արտահայտված, նրա դատվածութիւնը վերացավ և նա հնարավորութիւն ստացավ հայրենիք վերադառնալու: Հետևաբար, Փարպեցու այդ վկայութիւնները որեւէ առնչութիւն չունեն շինական դասի ոռոգիչական դրույթյան հետ և չեն կարող հիմք ծառայել հին Հայաստանի շինականներին ճորտեր համարելու համար:

4

Ակադ. Մանանդյանի համար շինականների ճորտ լինելու վերաբերյալ ասպաղղույց է ծառայում նաև Ղազար Փարպեցու «Թղթում» արտահայտութիւնը գտած ինքնակենսագրական տեղեկութիւններից մեկը, որին մեր մի շարք ան-

¹⁴ Նույն տեղում, էջ 158:

¹⁵ «Եղիշի վասն վարդանայ և հայոց պատերազմին», Երևան, 1957, էջ 183:

¹⁶ Նույն տեղում, էջ 187:

¹⁷ Նույն տեղում:

¹⁸ Նույն տեղում:

վանի գիտնականներ միանգամայն հակառակ մեկնաբանություն են տվել: Մինչդեռ այդ տեղեկության հիման վրա ակադ. Մանանդյանը Փարպեցուն համարում է ճորտական ծագում ունեցող, Զարրհանայանը, պրոֆ. Գր. Խալաթյանը և ակադ. Մ. Արեղյանը ծագումով նրան համարում են ազնվական՝ կապված Մամիկոնյանների կամ Արծրունիների հետ:

Վկայակոչելով Փարպեցու համապատասխան հատվածը, Մանանդյանը գրում է. «Որպեսզի Փարպեցին կարողանար հոգևորական դառնալ և ստանալ «ազատություն», որ հատուկ էր եկեղեցականներին, հարկավոր է եղել նրան «ծառայությունից» «զատուցանել»: Եթե շինականները լինեին ազատ՝ դրժվար թե հարկավոր լիներ նրանց ազատագրումը նախկին «ծառայությունից»¹⁹:

Պատմաբանի այս դատողությունները միանգամայն տրամաբանական են թվում, եթե նրա կողմից վկայակոչվող տեքստն անառարկելիորեն ճիշտ է մեկնաբանված: Սակայն նախքան նրա կողմից նշված տեքստի վերլուծության անցնելը, անհրաժեշտ ենք համարում հիշատակել Փարպեցու կենսագրության հետևյալ հանրահայտ փաստերը: Վահան Մամիկոնյանին ուղղած իր «Թղթի» մեջ Փարպեցին գրում է. «Երանելի մայրն քո յորժամ առ Բղեշխն ած գձեզ, յորում դրան և զմեզ ուսուցանէին, սակայն թէպէտ և քստ տիոց աւագագոյնք քան գձեզ էար, այլ սննդակիցք էար գձեզ և խաղակիցք, կրելով ի խաղու զարկանելիս ձեր զկնի ձեր. սնուցանէ մայրն ձեր օրհնեալ և Անուշ-Վոամ (Բղեշխի կինը և Վահան Մամիկոնյանի մորաքույրը. — Ս. Մ.) քստ իւրեանց հողեսիրութեանն և զմեզ քնդ ձեզ՝ որպէս և գձեզ»²⁰:

Այսպիսով, Փարպեցին ոչ միայն Վահան Մամիկոնյանի սննդակիցն ու խաղընկերն է եղել, այլև պատանի հասակում նրան դաստիարակել են ազնվատոհմ տիկիններն այնպես, ինչպես Վահան Մամիկոնյանին և նրա եղբայրներին: Այնուհետև նա ասում է՝ «Մենալ և ուսեալ առ ոտս առաքինակրօն սրանելոյն Ադանայ, որ էր ազգաւ ի հոյակապ և յականաւոր տոհմէն Արծրունեաց...»²¹: Փարպեցու այս ինքնակենսագրական ակնարկներից պարզովյաժմ երևում է, որ այդ բարձր ազնվականությունը հոգատար վերաբերմունք է ունեցել ղեկի Փարպեցին և նրա դաստիարակության ու կրթության գործում խրտրություն չի դրվել նրանց երեխաների և Փարպեցու միջև: Եթե նկատի ունենանք այս տվյալները և Մանանդյանի այն վստահացումը, թե «արհամարհական վերաբերմունքը, որ ուներ գյուղացիական դասի հանդեպ ազնվականությունը միջնադարյան Եվրոպայում, նկատելի էր նաև հայկական աղբյուրներում»²² և եթե ճիշտ է Մանանդյանի այս վերջին հավաստիացումը, ապա մեծապես կասկածելի է դառնում Փարպեցու ճորտ լինելու հանգամանքը:

Այժմ քննության առնենք հիմնականը՝ թե ակադ. Մանանդյանի վկայակոչած տեքստը որքան է համապատասխանում նրա մեկնաբանությանը:

«Արդ՝ զառաջին կելոյն իմոյ զվարս ներսեհ և Հրահատ Կամսարական գիտեն. զՍիւնեացն՝ յառաջագրեալ եպիսկոպոսն աշխարհի: Եւ դու յայց ելեալ խնդրել գիս, և գտեալ յաշխարհին յայնմ՝ ածեր ի տուն, ոչ իրրև զաղքատ զոք ի կազմածէն և ի մանկաւոյն, և ոչ իրրև օտար զոք ի քին և կամ զծառայ ուրուր:

19 Հ. Մանանդյան, Ֆեոդալիզմը հին Հայաստանում, էջ 163:

20 «Ղազարայ Փարպեցույ Պատմություն Հայոց և Թուրք», 1907, էջ 411:

21 Նույն տեղում, էջ 19:

22 Հ. Մանանդյան, Ֆեոդալիզմը հին Հայաստանում, էջ 175:

քանզի պարեգոտաւորը ազատեալ էն ի Քրիստոս: Իսկ որ զատոյցն զիս պարեգոտիք ի ծառայութենէ աշխարհիս և ազատութեան հղև մեզ առիթ, տէր Աղան՝ քո տեառն քեռի էր»²³:

Այս հատվածի առաջին նախադասության մեջ արտահայտված «ոչ իբրև օտար զոր ի քէն» դարձվածքի մեկնաբանությունը Զարհանալյանի և Նալաթյանցի կողմից, որոնք այդ հիման վրա Փարպեցուն համարել են «բնտիր և ազնվական ցեղից» կամ «ազատ կամ յազգէ ազնուաց», Մանանդյանի կարծիքով սխալ է, որովհետև դրանով Փարպեցին ակնարկում է ոչ թե իր ազգակցությունը Մամիկոնյան տոհմի հետ, այլ «որ ինքն օտար չէ Վահանին, իբրև սննդակիցը մանկության հասակում»: Փարպեցու այդ դարձվածքը, կտրված նրա կենսագրության մյուս հանգամանքներից, այնքան կարճաոտ է, որ հավանական կարելի է համարել թե՛ մեկ, թե՛ մյուս կոահումբ: Ուշագրավ է, որ Մանանդյանի կողմից «Փարպեցու վկայության այս նոր մեկնաբանությունից» զրեթե երկու տասնամյակ անց մեր անվանի հայկաբան Մանուկ Աբեղյանը, անդրադառնալով այդ հարցին, գրում է. «Հավանորեն նա որևէ ազգակցության կամ մերձավոր կապ է ունեցել Մամիկոնյան կամ Արծրունի տոհմի հետ...»²⁴:

Այսպիսով, այն ժամանակ, երբ հայտնի էր Մանանդյանի նոր մեկնաբանությունը, Մ. Աբեղյանը ևս շատ հեռու էր Փարպեցուն ծագումով ճորտ համարելու ենթադրությունից, որովհետև հիմնվում էր ոչ թե այդ կարճաոտ դարձվածքի, այլ նրա կենսագրության վերաբերյալ տվյալների ամբողջության վրա: «Որ այդ խոսքերը չեն կարող հիմք ծառայել Փարպեցու ազնվական ծագման,—գրում է Մանանդյանը,—այդ ավելի քան պարզ երևում է նույն հատվածի վերջին պարբերությունից, որի մեջ Փարպեցին իր ծագման մասին վկայում է, որ իրեն հոգևորական դարձնելով, ծառայությունից զատուցել և ազատության առիթ է եղել տեր Աղանը, Վահան Մամիկոնյանի քեռին»²⁵: Այս առնչությամբ Մանանդյանը միանգամայն իրավացիորեն ընդգծում է, որ «չինականների «անադատ» լինելը, այսինքն, «ազատների» դասին չպատկանելը՝ դեռևս ապացույց չէ նրա ճորտական վիճակի»²⁶: Այնուհետև՝ «եթե շինականների «ծառայությունն» անվանվել է... «ի հարկի ծառայություն»... ազնվականների «ծառայությունը», նմանապես և հոգևորականների «ծառայությունը» համարվել են «ի սպասու ծառայութիւն», իսկ ստրուկներին՝ «ի ստրկաց կարգի ծառայութիւն...»²⁷:

Հետևաբար, առանց համապատասխան որոշիչների «ծառայություն» և «ազատություն» բառերը տերմինաբանական նշանակություն չեն ստանում և հարցը պարզել չեն կարող: Ակադ. Մանանդյանը այդ կոնտեքստում «ծառայություն»-ը համարում է հատուկ տերմին, «ի հարկի ծառայությունը» Մանանդյանի մեկնաբանությամբ նշանակում է ճորտություն, իսկ «ազատություն»-ը՝ ճորտությունից ազատագրում: Մինչդեռ նրա վկայակոչած տեքստում այդ իմաստները, մեր կարծիքով, խառն բացակայում են: Տեքստում խոսքը ոչ թե «ծառայութիւն»-ից «ազատելու» մասին է, այլ «աշխարհիկ ծառայութիւն»-ից, իսկ դրանք, մեզ թվում է, բոլորովին տարբեր իմաստներ են: Եթե առաջին

²³ Նույն տեղում, էջ 164:

²⁴ Մանուկ Աբեղյան, Հայոց հին գրականության պատմություն, գիրք Ա, 1944, էջ 311:

²⁵ Հ. Մանանդյան, Ֆեոդալիզմը հին Հայաստանում, էջ 165:

²⁶ Նույն տեղում, էջ 161:

²⁷ Նույն տեղում, էջ 156:

ղեկարում հնարավոր է ենթադրել, որ խոսքը վերաբերում է «ի հարկի հաստատության»-ը կամ Մանանդյանի մեկնաբանության համաձայն՝ շինականների ճարտարին կացությանը, ապա երկրորդ ղեկարում այդ ենթադրությունն խառնաճառվում է, քանի որ «ծառայություն աշխարհի» հասկացությունը հակադրություն է ոչ թե «ի սպասու ծառայության» հասկացության, այլ հոգևոր ծառայության: Ուստի, տվյալ կոնտեքստում, «ծառայություն աշխարհի» նույն զինվորական և «գործակալական» ծառայության իմաստն ունի: Ծիշտ է, հիշված տեքստում հիշատակված է, որ Աղանը պատճառ է դարձել Փարպեցու «ազատության», բայց այդտեղ դա նշանակում է ոչ թե ճորտությունից ազատագրում, այլ նույն իմաստն ունի, ինչ որ նախորդ նախադասության «պարեգօտաւորը ազատեալ են ի Քրիստոս», այսինքն՝ Աղանը, Փարպեցուն հոգևորական ձեռնադրելով, պատճառ է դարձել աշխարհիկ ծառայությունից նրա ազատվելուն և հոգևոր ծառայություն ստանձնելուն, ավելի պարզ ասած՝ Աղանը Փարպեցուն պարեգօտաւոր է դարձրել, կրօնական չ ձեռնադրել: Այս ամենում, ինչպես տեսնում ենք, նշույլ անգամ չկա ճորտության մասին:

5

Հին Հայաստանի շինականների «ճորտ» լինելուն իրրև ապացույց Հ. Մանանդյանը վկայակոչում է Մովսես Խորենացու «Ողբ»-ի մի արտահայտություն: Նկարագրելով հայ ժողովրդի գանազան խավերի արատավոր բարքերը, Խորենացին գրում է՝ «Ժողովրդականք վէսք, ստահակք, մեծախօսք, անվաստակք, այրեցողք, (ըստ Մանանդյանի՝ արբեցողք—Ս. Մ.), վնասակարք, փախչողք ի ժառանգութենէ»:

Մեր նշանավոր բանասերներից Խ. Ստեփանն և Մ. Էմինը «փախչողք ի ժառանգութենէ» արտահայտությունը թարգմանել են «հոգևոր կոչումից փախչող», «հոգևոր կոչումից խուսափող»: Այս թարգմանությունները բառացի վերցրած սխալ չեն, բայց բոլոր էություն հակասում են պատմական իրողությանը: «Ժողովրդականները» հազիվ թե փախչելին կամ խուսափելին մի արտոնությունից, որը հսկայական առավելությունների աղբյուր էր ծառայում, և V դարում ոչ ոք համեցեր չէր անում «Ժողովրդականներին» այդ կոչումը, որը հոգևոր դասի արտոնությունն էր: Եվ միանգամայն իրավացի է Մանանդյանը, երբ մերժում է այդ թարգմանությունները: Իսկ Ս. Մալխասյանը «փախչողք ի ժառանգութենէ» արտահայտությունը ծանոթագրում է իրրև անհասկանալի:

Հ. Մանանդյանը, հենվելով Գալուստ Տեր-Մկրտչյանի (Միաբանի) բանավոր կարծիքի վրա, գտնում է, որ «փախչողք ի ժառանգութենէ» արտահայտությունը վերաբերում է շինականներին: Ուստի «ժառանգութիւն» այդ կոնտեքստում նշանակում է «ալն հողը և շինական ծառայության» այն ժառանգությունը, որից շինականներն աշխատել են խուսափել և ազատվել փախուստի միջոցով»²⁸: Այս մեկնաբանությունն իրոք որ սրամիտ է, բայց զժվար թե համապատասխան լինի իրականությանը: «Այս երևույթը,— գրում է Մանանդյանը,— ինչպես զիտենք, ճորտական գյուղացիության համար սովորական է եղել նաև ուրիշ երկրներում: Հասկանալի է, որ եթե շինականներն աշխատում են փախչելու միջոցով հողից և ֆեոդալների հանդեպ իրենց պարտականու-

²⁸ Նույն տեղում, էջ 169, հմմտ. Քննական տեսություն..., էջ 369:

թյուններից ազատվել, ապա այդ կարող էր լինել միայն այն դեպքում, եթե շինականների վիճակն անտանելի էր: Մինչդեռ գիտնականը համոզիչ կերպով ապացուցում է, որ Հայաստանում «գոյություն չեն ունեցել հնագույն այս շրջանում ոչ ճորտական դաժան այն իրավունքը, որ ժն—ժՁ դարերից սկսած հետզհետե գոյացել ու դարգացել են, գլխավորապես Արևելյան նվրոպայում, ոչ էլ այդ երկրների крепостной կամ leibeigen կոչվող ստրկական գյուղացիությունը, որը ամենամեծ չափերով ենթարկված է եղել կալվածատեր ազնվականության քմահաճ ու անողբ շահագործմանը»²⁹: Եթե ճիշտ է ակադ. Մանանդյանի այդ եզրակացությունը (մեր կարծիքով, միանգամայն ճիշտ է), ապա անհամոզիչ է թվում վերոհիշյալ այն ենթադրությունը, որ շինականները, փախուստի դիմելով, աշխատել են խուսափել ծանր լծից: Տրամաբանական չէ երևույթի պատճառը բացասել, իսկ հետևանքն ընդունել:

Մյուս կողմից, «Ողբ»-ում հիշատակված այդ արատները չեն կարող համարվել ժամանակից կտրված երևույթ: Կոնկրետ դեպքում մեր պատմիչի ինչպես ամբողջ «Ողբ»-ը, այնպես էլ հիշատակված հատվածը ոչ մի կերպ չի կարելի վերագրել ոչ իր ժամանակին: Այլ բան է, երբ «Պատմության» մեջ նա խոսում է ընդհանուր պատմական երևույթների մասին, որոնք կարող էր փոխառած լինել այլ աղբյուրներից, ժողովրդական ավանդություններից և վերջապես, կարելի կլինի ենթադրել, որ դրանք գոյություն են ունեցել երկաթ ժամանակ: Օրինակ, երբ Մանանդյանը համայնական հողատիրության հարցում վկայակոչում է Մովսես Խորենացուն, այդտեղ որևէ տարօրինակ բան չկա, քանի որ այդ կարգի հողատիրությունը գոյություն է ունեցել դարերով:

Ինչպես հայտնի է, Հ. Մանանդյանը Խորենացուն համարում է IX դարի հեղինակ: Նույնպես հայտնի է, որ «Ողբ»-ը պատմիչի հոգեկան տրամաբրությունների զեղումն է, ուստի և իր ժամանակի իրական դրության մետավոր արտացոլումը: Մեզ համար անհասկանալի առեղծված է մնում, թե ինչպես կարող է Մովսես Խորենացու «փախչողը ի ժառանգութենէ» արտահայտությունը, որ ըստ Մանանդյանի գրվել է IX դարում, արտահայտելիս լինի V դարի շինականների սոցիալական ընդվզումները: Մյուս կողմից, եթե հետևելով ակադ. Մանանդյանին, ընդունենք, որ «փախչողը ի ժառանգութենէ» արտահայտությունը բնորոշում է շինականներին սկսած V դարից մինչև IX դարը, ապա նույն տրամաբանությամբ չենք կարող շընդունել, որ «վէսը, ստահակը, այրեցողը (կամ արբեցողը), վնասակարը» արտահայտությունները նույնպես վերաբերում են շինականներին այդ նույն ժամանակներում: Ավելին, ընդունելով Մանանդյանի այդ ենթադրությունը, պարտադրաբար, պետք է ընդունել նաև, որ ազնվականության և հողեփրականության վերաբերյալ Խորենացու նշած արատները նույնպես վերաբերում են նշված ամբողջ ժամանակաշրջանին: Հետևաբար, պետք է հանգել այն արտառոց եզրակացության, որ Խորենացու կարծիքով ամբողջ հայ ժողովուրդը, իր բոլոր դասերով, սկսած V դարից մինչև IX դարը, արատների մի հավաքածու էր: Մի բան, որ ոչ միայն հակասում է Պատմահոր ամբողջ էությանը, այլև առաջին հերթին Մանանդյանի և ամեն մի բանիմաց մարդու ըմբռնմանը: Ուստի, մեր կարծիքով, միանգամայն իրավացի է Ստ. Մալխասյանցը, երբ գրում է՝ «նկարագրված բացա-

²⁹ Հ. Մանանդյան, Քննական տեսություն հայ ժողովրդի պատմության, հատ. Բ, մաս Ա, էջ 370. հմտ. Ֆեոդայիզմ..., էջ 179—180:

սական երևույթները ոչ այնքան իրականության պատկերն են, որքան անկեղծ հայրենասեր հեղինակի վշտահար հոգու»³⁰։

Ուրեմն, մենք կարծում ենք, որ «փախչողք ի ժառանգութենէ» հազիվ թե ունենա այն նշանակությունը, որը դրան վերագրում է Մանանդյանը։

Մյուս կողմից «ժառանգութիւն» բառը շատ առաձգական և բազմաթիվ առումներ ունեցող բառերից է. նա կարող է նշանակել ոչ միայն ժառանգած փայլ (կամ ինչպես Մանանդյանն է ենթադրում՝ «հոգր և շինական ծառայութիւն ծանր վիճակը»), ոչ միայն եկեղեցական կոչում, ինչպես Մ. էմինը և Խ. Ստեփաննեն կարծում, այլև բնդհանրապես հոգևորականություն, հոգևոր իշխանություն (տե՛ս Առձևոն և Բացատրական բառարանները), ուստի ամենևին անհավանական չէ, որ «փախչողք ի ժառանգութենէ» արտահայտությամբ Խորենացին ուզում էր ասել, որ ժողովուրդը հոգևորական իշխանությունից կամ, ավելի ճիշտ, բրիստոնեական դոգմաներից փախչում էր, որ այլ բան չի նշանակում, քան այն, որ քրիստոնեական հավատը ժողովրդի մեջ խիստ թուլացել էր։

6

Մենք կարևոր ենք համարում քննության առնել Մ. Խորենացու գործածած «առանձնականութիւն» արտահայտությունը, որին մեր ամենաականավոր հայկաբանները տարբեր բովանդակություն են հաղորդում և տարբեր եզրակացությունների հանդուժելու ակադ. Մանանդյանի համար այդ արտահայտությունը կովան է ծառայում, որ «Հայաստանի նման նախարարական մի երկրում, որը բաժանված էր անջատ ու գրեթե անկախ իշխանությունների... կարող էին նույնիսկ լինել ճորտական գյուղացիությունից դուրս նաև ազատ գյուղացիության մնացորդներ»³¹։ Բայց այդ հանգամանքը չէր կարող բացասել... շինական դասի հոծ բազմության իրավական դրության գլխավոր հատկանիշները՝ «ի հարկի ծառայութիւն»-ը և ճորտական վիճակը, որոնք իրենց հիմնական դժերով, ըստ երևույթի, միևնույն բնույթը պետք է ունենային նախարարական Հայաստանի բոլոր շրջաններում»³²։

Ահավասիկ, իր այս դրույթն ապացուցելու համար Մանանդյանը կովան է ծառայեցնում «առանձնականութիւն» արտահայտությունը։

Խորենացին, գտնելով, որ մեր երկրում ևս հիշատակության արժանի պատմական իրադարձություններ չեն տեղի ունեցել, բայց մեր նախնիքները հոգ չեն տարել դրանք գրի առնել, նշում է՝ դուցե ոմանք պատճառաբանեն, թե դրան խանդարել են պատերազմները և սեփական գիր չունենալը։ Պատմահայրը գտնում է, որ նման արդարացումներն անտեղի են, որովհետև պատերազմներն անընդհատ չեն եղել և կարող էին գրել հունարեն կամ պարսկերեն, քանի որ «գիր Պարսից և Յունաց, որովք այժմ գիւղից և գաւառաց, ևս և յուրաքանչիւր տանց առանձնականութեանց, և հանուրց հակառակութեանց և դաշանց այժմ առ մեզ գտանին անբաւ զրուցաց մատեանք»։ Ակադ. Մանանդյանը, բերելով այդ հատվածի Խորեն Ստեփաննի թարգմանությունը, գտնում է, որ

³⁰ Մ ո Վ ս ե ս Խ ո Ր ե ն ա ց ի, Հայոց պատմություն, Թարգմ. Ստ. Մալխասյանի, էջ 414։

³¹ Հ. Մ ա ն ա ն դ յ ա ն, Ֆեոդալիզմը հին Հայաստանում, էջ 171։

³² Նույն տեղում, էջ 173։

«այս թարգմանության մեջ անտես է առնված «առանձնականություններ» բառը, որի իմաստը ըստ երևույթին չի հասկացվել»³³։ Խ. Ստեփանյանն այդ հատվածը թարգմանել է այսպես՝ «զանազան գյուղերի, դավառների և առանձին տների վեճեր ու դաշինքներ»։ «Իրաքանչիւր տանց առանձնականութեանց» դարձվածքն այդտեղ, ինչպես տեսնում ենք, թարգմանված է մեր ընդդեմ առանձին տներ արտահայտությամբ։ Ուստի կարծում ենք, որ ըստ Ստեփանյանի «առանձնականություն» նշանակում է առանձին, հետևաբար ակադ. Մանանդյանին հետաքրքրող բառն այդտեղ թարգմանված է (սխալ, թե ճիշտ, դա այլ հարց է)։ Ստեփանյանի թարգմանության մեջ բացակայում է հորենացու «իրաքանչիւր» բառը, որը նշանակություն չունի, բանի որ «յուրաքանչյուր առանձին տուն» և «առանձին տներ» արտահայտությունների միջև ըստ էության որևէ տարբերություն չկա։ Մենք կարծում ենք, որ Խ. Ստեփանյանի թարգմանության թերությունը ոչ թե այդ բառի բաց թողնելը կամ թարգմանելն է, այլ այն, որ հարցի էությունը ճիշտ չի հաղորդված։ Եվ այդ տեսակետից Հ. Մանանդյանի և Խ. Ստեփանյանի թարգմանությունների միջև մենք որևէ տարբերություն չենք տեսնում։ Ակադ. Մանանդյանն այդ հատվածը թարգմանում է այսպես. «Երկուսն էլ են ունեցել Պարսից և Հունաց գրերը. որոնցով գրված այժմ գտնվում են մեզ մոտ մեծ թվով պատմողական հուշագրեր, որ վերաբերում են գյուղերի ու դավառների և ամեն մի տան առանձնականություններին, նաև բոլոր հակառակություններին ու դաշինքներին»³⁴։ Այսպիսով, ինչպես Խ. Ստեփանյանի, այնպես էլ Մանանդյանի թարգմանությամբ ստացվում է, որ առանձնականությունները (կամ ըստ Մանանդյանի՝ առանձնահատկությունները = особенность, своеобразность)³⁵, վերաբերում են ոչ միայն նախարարական տներին, այլև գյուղերին ու դավառներին։ Դրանով Մովսես հորենացու այդ վկայությունը խիստ մոտենում է Հ. Մանանդյանի կոնցեպցիային։ Ուրեմն, եթե նկատի ունենանք շինականների իրավական դրության մեջ հետաքրքրող հարցը, պետք է եզրակացնենք, որ հորենացու խոսքը տարբեր գյուղերի ու դավառների շինականների դրության առանձնահատկությունների մասին է, այսինքն՝ մի տեղ բահրատություն, մի այլ տեղ կոոպորություն, հնարավոր է նաև ազատ գյուղացիության որոշ մնացորդ, բայց դրանք «չեն կարող, իհարկե, բացասել շինական դասի հոծ բաղմունության իրավական դրության «ի հարկի ծառայություն»-ը և ճորտական վիճակը»³⁶։

Ակադ. Մանանդյանի կողմից ինչպես ամբողջ հատվածի իմաստի թարգմանությունը, այնպես էլ «առանձնականություն» բառի մեկնարանությունը մեզ անհամոզեցուցիչ են թվում։ Խորենացին «գիւղից և դաւառաց» բառերից հետո գրում է՝ «ևս և տանց առանձնականութեանց...»։ Մենք տրամադիր ենք կարծելու, որ Պատմահայրն այդ «ևս և»-ով «առանձնականութեանց» և հաջորդ բառերը ոչ թե միացնում, այլ անջատում է նախորդ բառերից։ Ուստի, մեր կարծիքով, Մանանդյանի թարգմանությունը պետք է խմբագրվի այսպես՝ «գո-

³³ Հ. Մանանդյան, Քննական տեսություն հայ ժողովրդի պատմության, հատ. Բ, մաս Ա, էջ 364—365։

³⁴ Նույն տեղում, էջ 364։

³⁵ «Տեղեկագիր Դիտության և արվեստի ինստիտուտի», 1926, N 1, էջ 36։

³⁶ Հ. Մանանդյան, Քննական տեսություն հայ ժողովրդի պատմության, հատ. Բ, մաս Ա, էջ 365։

յություն են ունեցել Պարսից և Հունաց գրեր, որոնցով գրված այժմ գտնվում են մեզ մոտ մեծ թվով պատմողական հուշագրեր, որ վերաբերում են գյուղերին ու գավառներին, ինչպես և տոհմերից յուրաքանչյուրի առանձին լինելուն, ընդհանուր հակառակություններին և դաշինքներին: Այս խմբագրությունամբ, ի հակադրություն Մանանդյանի, առանձնականությունները, հակառակությունները և դաշինքները վերաբերում են ֆեոդալական տներին (տոհմերին), բայց ոչ գյուղերին ու գավառներին: Ընդհանրապես է, որ մենք այստեղ գործ ունենք միջֆեոդալական գծությունների ու համաձայնությունների հետ: Հարցին այդպես մոտենալով, մեզ թվում է, միանգամայն հասկանալի է դառնում առանձնականութեանց բառի իմաստը, որ պարզապես նշանակում է առանձին լինելը, մյուսներից կախում չունենալը, կամ ավելի պարզ ասած՝ տոհմերի ֆեոդալական տրոհվածությունը:

Ուշագրավ է, որ շինականների միջև թիրավական ու տնտեսական դրության մասնակի տարրերություններն ու առանձնահատկությունները... մենում են մութ փաստական տեղեկությունների բացակայության պատճառով³⁷: Ընդհանրապես բազմաթիվ գրավոր աղբյուրներ է ունեցել այդ առանձնահատկությունների մասին, ապա հագիվ թե Պատմահայրը դրանցից գոնե մի քանիստ չգետնեցիր իր Պատմության մեջ: Միևնույն ժամանակով տեղեկություններ են գտնում տոհմերի (տների) առանձնահատկությունների՝ ֆեոդալական տրոհվածության վերաբերյալ, օրինակ, Բուլբատունիների, Արծրունիների, Կնունիների, Ամատունիների և ուրիշների (տե՛ս Պատմություն, դիրք 2, է. ր. Ժ է և այլն):

Դ

Ակադ. Մանանդյանն իրավացիորեն գտնում է, որ «շինական»-ների տնտեսական կացության ամենակարևոր խնդիրներից մեկն է «կոռ»-ի խնդիրը պատմական շնագույն այս շրջանում³⁸: Այնուհետև հարցելի պատմաբանը բերում է երկու վկայություն իրեն կոռի առկայության ապացույց և եզրակացնում. «Վերոհիշյալ վկայություններում «կոռ»-ն, անտարակույս, այն պարտադիր աշխատանքներն էին, որոնք ինչպես միջնադարյան *cervea*-ն, գերմ. *Frohndienst*-ը և ռուս. *барщина*-ն, կատարվելու էին ձրի կալվածաաիրոջ մոռանքով»:

Ընդ գիտնականին իսկապես հաջողվեց անառարկելիորեն ապացուցել իր այդ թեզը, դա ինքնին չատ յուրջ հիմք կլինեք շինականներին ազնվականների գույք և հողին ամրացած ճորտեր համարելու: Բայց, դժբախտաբար, ակադ. Մանանդյանին ոչ միայն չի հաջողվել այդ հույժ կարևոր թեզն ապացուցել, այլև շինականների և ազնվականների նրա կողմից պատկերացրած հարաբերությունների պայմաններում այդ անել անհնարին է, առանց հակասելու տնտեսական տնտեսագիտության սկզբունքներին:

«Կոռ» անբմիկով, ինչպես հայտնի է, արդի հայերեն տնտեսագիտական և պատմական գրականության մեջ արտահայտվում է նույն իմաստը, ինչ որ ռուսերեն գրականության մեջ *барщина* անբմիկով, այսինքն այդ այն հավելյալ աշխատանքն էր, որ ֆեոդալական արտադրահարաբերությունների պայ-

³⁷ Ն. Մանանդյան, Ֆեոդալիզմը հին Հայաստանում, էջ 173:

³⁸ Նույն տեղում, էջ 208:

³⁹ Նույն տեղում, էջ 209—210:

մասնակցությունը ստեղծում էր աշխատավճարը և ներդրում էր տնտեսությանը, ազգային խնայողությանը, հենց այդ պատճառով էլ գործ է ածում «կոոպերատիվ» կոչումը, որը հայտնի էր հայտնի միայն այն դեպքում, երբ աշխատանքը արտադրողը (ներկա դեպքում շինականներ—Ս. Մ.) շարաքովա մի մասում... մշակում է փաստորեն իրեն պատկանող հողը... իսկ շարաքովա մեացած օրերին անվարձ աշխատում է հողի տիրոջ կալվածում, հողատիրոջ համար...»⁴⁰ Այսպիսով, կոոպերատիվ աշխատանքը ենթադրում է անհատական տնտեսական աշխատանք (ոչ գիյվածային), բուն արտադրողի անհրաժեշտ աշխատանքի համար հողի առանձնացում, կալվածատեր ֆեոդալի ինքնուրույն, բուն արտադրողի անտեսությունից անջատ տնտեսություն, որտեղ գործադրվում է հավելյալ աշխատանքը, կամ այլ կերպ ասած՝ անհրաժեշտ է հավելյալ աշխատանքներն իրարից անջատված են։ Առանց այս անհրաժեշտ պայմանների վերահիշյալ առումով կոոպերատիվ աշխատանք չի կարող զուգակցվել տնտեսության հոսքի փոխանցմանը, քանի որ հողատիրոջ անհրաժեշտ աշխատանքը չի կարող զուգակցվել հողատիրոջ անհրաժեշտ աշխատանքին, որտեղ... իրենց աշխատանքով է իրենց ինքննտարով մշակում էին այն, նրանից իրենց ապրուստն ստանալով։ Գյուղացիների այս աշխատանքի արդյունքը... անհրաժեշտ պրոդուկտ էր. անհրաժեշտ գյուղացիների համար, որպես նրանց ապրուստի միջոցներ տվող, կալվածատիրոջ համար, որպես նրան աշխատող ձեռքեր տվող, իսկ է իսկ այնպես, ինչպես կապիտալի արժեքի փոփոխական մասին փոխարինող պրոդուկտն անհրաժեշտ պրոդուկտ է կապիտալիստական հասարակության մեջ։ Իսկ գյուղացիների հավելյալ աշխատանքը՝ նրանց կողմից միևնույն ինքննտարով կալվածատիրոջ հողը մշակելն էր. այս աշխատանքի պրոդուկտը գնում էր կալվածատիրոջ օգտին։ Հավելյալ աշխատանքն այստեղ, հետևաբար, տարածականորեն անջատված էր անհրաժեշտից. կալվածատիրոջ համար մշակում էին կոոպերատիվական հողը, իրենց համար՝ իրենց հողաբաժինները. կալվածատիրոջ համար աշխատում էին շարաքովա որոշ օրերին, իրենց համար՝ մյուս օրերին։ Այսպիսով գյուղացու հողաբաժինը այս տնտեսության մեջ հանդիսանում էր որպես բնավճար աշխատավարձը... կամ կալվածատիրոջը աշխատող ձեռքերով ապահովելու միջոց։ Գյուղացիների սեփական տնտեսությունն իրենց հողաբաժնի վրա կալվածատիրոջ տնտեսության պայմանն էր, որի նպատակը ոչ թե գյուղացուն ապահովելն էր ապրուստի միջոցներով, այլ կալվածատիրոջը՝ աշխատող ձեռքերով»⁴¹։

Հենց ինքուր, հարգելի գիտնական, հենվելով սեռագույն ուսումնասիրությունների վրա, մեզ տալիս է հետևյալ բնագիտությունը. «ճորտական գյուղացիության վիճակը մեծապես կախված է եղել երկու իրարից տարբեր սխեմաներից. որ անվանում են հողային տիրություն (Grundherrschaft) և տնտեսային տիրություն (Gutsheerrschaft)։ Հողային տիրություն է կոչվում սենյորական կազմակերպությունը, երբ սենյորն ստանում է իր գյուղացիներից զանազան տուրքեր ու հարկեր, բայց ինքը չունի իր սեփական մեծ տնտեսությունը, իսկ տնտեսային տիրություն՝ երբ սենյորը թեև նույնպես

⁴⁰ Ս. Մ. Բ. Բ., Կապիտալ, հատ. 3, մաս 2, էջ 227.

⁴¹ Վ. Բ. Լ. Ե. Ե., Երկիր, հատ. 3, էջ 220—221.

ստանում է իր գյուղացիներից տուրքեր ու հարկեր, բայց նրա եկամուտի գրվախափոր աղբյուրը ոչ թե այդ վնասումներն են, այլ նրա բնությունն ինքնուրույն, որն նա օգտագործում ու մշակում է նորապեղյալ գյուղացիների պարտադիր աշխատանքով»⁴² (ընդգծումը մերն է—Ս. Մ.):

Այս բացատրությունից ինքնին բխում է, որ եթե «գոյություն է ունեցել Արշակունյաց ժամանակ թե աշխատապարտ և թե արդյունավետ ունեցող»⁴³, ապա հին Հայաստանի ֆեոդալական դասը պետք է ունեցած լիներ «ինքնուրույն խոշոր տնտեսություն», կամ առնվազն «հողային տիրության» գույքահեռ պետք է գոյություն ունեցած լիներ նաև «տնտեսային տիրություն»։ Բայց բանից գուրս է գալիս, որ «պատմական աղբյուրներից բնավ չի բխում, որ նախարարներն իրենք ևս եղած լինեին խոշոր հողատերեր և ունեցած լինեին սեփական և ինքնուրույն մեծ տնտեսություններ։ Նրանց եկամուտի գլխավոր աղբյուրը կազմել են, հավանաբար, շինականներից ստացվող տուրքերը և հարկերը։ Հին Հայաստանի կալվածատիրական սիստեմը համապատասխան պետք է բնորոշվի հողային տիրություն կոչվող սենյորական կազմակերպությանը»⁴⁴ (ընդգծումը մերն է—Ս. Մ.)։ Ուրեմն, մի կողմից արձանագրվում է, որ ոռոսական Ծարщина-ի իմաստով կոոի առկայությունը հին Հայաստանում անառարկելի փաստ է, մյուս կողմից, որ հայ ֆեոդալները ինքնուրույն տնտեսություն չեն վարել։ Մեզ համար առեղծված է մնում, թե այդ դեպքում որտեղ էր դործագրվում շինականի՝ ժամանակով ու տարածությամբ իր «սեփական» հողակտորից դուրս այն հավելյալ աշխատանքը, որն աշխատավճար ունեցող էր ստեղծում։ Անհասկանալի առեղծված է մնում, թե ինչպե՞ս կարող է գոյություն ունենալ Ծарщина առանց Ծарское хозяйство-ի և Ծарская запашка-ի։

Արդ՝ ի՞նչն է ակադ. Մանանդյանի համար կոմսի ծառայում կոոպորության, իբրև Ծарщина, առկայության համար։ Նա բերում է երկու վկայություն։

1. Ակադ. Մանանդյանը, բերելով Գլինի ժողովի ժԱ կանոնը, այնտեղ արձանագրված... կոոպի և պատմության նկատմամբ, զոգորմելի եղբարսն չարչարեն անխղճարար», հիմնվելով Գոշի վրա ուղղում է՝ «...կոոպի և պատմության նկատմամբ և զոգորմելի եղբարսն չարչարեն անխղճարար»։ Այս ուղղումը մեր կարծիքով հնարավոր է։ Ընդունելի պետք է համարել դիտականի այն ենթադրությունը, որ «կոո»-ը գոյություն ունեցած պիտի լինի Հայաստանում մարդպանության և, հավանաբար, նաև Արշակունյաց թագավորության շրջանում»⁴⁵։ Բայց նրա բերած տեքստից, իր իսկ ուղղումով հանգերձ, բոլորովին չի բխում, որ այդ տերմինով արտահայտվում էր իր հասկացած բովանդակությունը։ Մեզ ավելի հավանական է թվում, որ այդ կոնտեքստում «կոո» նշանակում է ոչ թե կալվածատիրոջ տնտեսության մեջ շինականի անընդհատ տեղական աշխատանքը, այլ դիպվածային, բուն հողագործության հետ առնչություն չունեցող աշխատանքը, ավելի պարզ ասած ոչ թե ոռոսներն Ծарщина-ի իմաստն ունի, այլ повинность-ի, որ նշանակում է պարհակ։ Այդ բխում է ոչ միայն

⁴² Հ. Մանանդյան, Քննական տնտեսություն հայ ժողովրդի պատմության, հատ. Բ, մաս Ա, էջ 368—369.

⁴³ Նույն տեղում, էջ 362.

⁴⁴ Նույն տեղում, էջ 369։ Տե՛ս նաև էջ 321 և 410.

⁴⁵ Հ. Մանանդյան, Ֆեոդալիզմը Հայաստանում, էջ 208, 209.

տեքստի ամբողջությունից, այլև «պահակութիւն» բառի Մանանդյանի ճիշտ բացատրությունից, որ կոռի հատուկ մի տեսակ էր: Բակ պահակությունը չէր կարող լինել աշխատավճար ունեւոր ստեղծող աշխատանք, այլ կարող էր լինել սոսկ ֆեոդալական պարհակ:

2. Ակաղ. Մանանդյանի բերած մյուս վկայությունը, շնայած ուղղակի Հայաստանին չի վերաբերում, բայց, ճիշտ է, կարող է կովան ծառայել նրա եզրակացության համար. հարկավ, եթե համապատասխանում է նրա մեկնաբանությանը: «Կարևոր է հիշել, — գրում է Մանանդյանը, — որ «կոռ»-ը մարդպանության ժամանակ գոյություն է ունեցել նաև Մասանյան Պարսկաստանում... Խոսելով երկարատև սովի և ժողովրդի ծանր դրության մասին... Տարբին հաղորդում է, որ Պերոզ թագավորը նամակների միջոցով հայտարարում է ամբողջ ժողովրդին, որ ապատում է նրան հողային հարկից և զլխահարկից, հանրօգուտ նպատակների համար ծանրություններից և կոռից, որ նրանց շնորհում է լիակատար ազատություն և հրամայում է, որ նրանք հողան ու մտածեն իրենց սնունդի և պահպանության մասին»¹⁶:

Այստեղ մենք նշույլ անգամ չենք տեսնում, որ խոսքը վերաբերում է ուսական Շարունա-ն հիշեցնող կոռին: Ընդհակառակն, տեքստի ամբողջությունը որոշակիորեն մեզ թելադրում է, որ այդ հատվածում կոռային աշխատանքը «հանրօգուտ» նպատակի էր ծառայում և ոչ թե կալվածատիրոջ տնտեսություններում գործադրվող ձրի աշխատանք էր: Եթե այնպես հասկանանք, ինչպես ակաղ. Մանանդյանն է մեկնաբանում, ապա դուրս կգա, որ Պերոզը ֆեոդալներին զրկում էր եկամուտների հիմնական աղբյուրից: Մինչդեռ թագավորը ժողովրդին ազատում է պետական հողային հարկից, զլխահարկից և ուսական կոռից: Այս կոնտրաստում «կոռ» տերմինն այլ բան նշանակել չի կարող, քան պետական ու հասարակական արտակարգ աշխատանքները՝ պարհակները: Զե որ հենց ինքը Մանանդյանն այլ առնչությամբ միանգամայն իրավացիորեն գրում է, որ «շինականները հարկատու են եղել ոչ միայն կալվածատիրոջը, այլև արքունիքին»¹⁷: Ուստի եթե թագավորը սովի ժամանակ գյուղացիներին ազատում էր հարկերից և հանրօգուտ կոռից, այդ նշանակում է, որ նկատի ուներ բացառապես պետական հարկերն ու պարհակները և ոչ թե ֆեոդալական ունեւորներին:

Ինչպես տեսանք, ակաղ. Մանանդյանի եզրակացության համար հիմք է ծառայում ոչ թե իր բերած տեքստի բովանդակությունը, այլև «կոռ» բառի առկայությունը միայն: Սակայն մեր անցյալ գրականության մեջ եզակի չեն այն դեպքերը, երբ կոռը նշանակում է դիպվածորեն, պատահած դեպքում, բուն գյուղացիական-արտադրական աշխատանքներից դուրս և կալվածատիրոջ անջատ տնտեսության հետ առնչություն չունեցող աշխատանքը, օրինակ՝ հալայների կողմից ճանապարհների, կամուրջների, առուների վերանորոգումը, կարիքավոր համայնքներին աշխատանքային օգնություն ցույց տալը, ֆեոդալների կամ պետական ամրոցների վերանորոգումը, բեռների փոխադրումը և այլն: 2. Մանանդյանը շատ մեծ էրուդիցիայի տեր գիտնական էր, և այդ հանրահայտ փաստը նրան քաջ հայտնի էր (տե՛ս Հայաստանի արքունի հարկերը մարդպանական շրջանում, «Տեղեկ. գիտ. և արվեստ. ինստ.», 1926, էջ 43):

¹⁶ Նույն տեղում, էջ 209:

¹⁷ Նույն տեղում, էջ 205:

և ա իր երեք աշխատությունների մեջ էլ կրկնում է. «Ֆրանսիական cervée-ն և գերմանական Frohndienst-ը, ինչպես հայտնի է, ունեցել են ընդարձակ իմաստ և դորժ են ածվել նաև պետական և հասարակական ընույթ ունեցող պարտականությունների համար: Այդպիսի աշխատանքներ էին, օրինակ, ճանապարհների շինությունն ու նորոգումը, փոխադրական միջոցների հայթայթումը... Հայկական «Կոռ»-ը ունեցել է նույնպիսի ընդարձակ իմաստ, ինչպես cervée-ն և Frohndienst-ը»⁴⁸:

Այսպիսով, «կոռ» տերմինի տակ ակադ. Մանանդյանը հասկանում է երկու իմաստ՝ 1) կալվածատիրոջ համար կատարվող ձրի աշխատանք, որի ղեկարում աշխատավճար ունեցող «իր ակնբախ, շոշափելի ձեռքի գոյություն ունի, քանի որ անմիջական արտադրողի՝ հենց իրեն համար կատարած աշխատանքը տարածապես և ժամանակապես ղեռ անջատված է հողատիրոջ համար կատարած նրա աշխատանքից»⁴⁹, 2) «պետական ու հասարակական ընույթի աշխատանքային պարտականություններ», այսինքն՝ պարհակներու Առաջին տեսակի «կոռը» անպայման կապված է գյուղացու հողին ամրացած լինելու և կալվածատիրոջ գույքը համարվելու հետ: Եվ այդ գոյութի ակադ. Մանանդյանին, մեր կարծիքով, չի հաջողվել ապացուցել, իսկ երկրորդ տեսակի կոռը կապված չէ ոչ հողին ամրացած լինելու, ոչ էլ գույք հանդիսանալու հանգամանքի հետ. դա ֆեոդալական պարհակ էր, որին ենթակա էին պետության հպատակները և համայնքի անդամները:

Այսպիսով, հին Հայաստանի շինականների ճորտ համարելու այս փաստարկումը ևս, մեր կարծիքով, իրական հիմք չունի:

S

Մեր խորին համոզմամբ պատմական տերմինների բովանդակության բարոնում ոչ միայն բանասիրական ու լեզվաբանական հարց է, այլ նաև մեծապես ընդհանուր կոնցեպցիայի հարց: Հին Հայաստանի շինական դասի ճորտ և գույք լինելու վերաբերյալ ակադ. Մանանդյանի եզրակացությունների անհամոզիչ լինելը բխում է քննարկվող հարցի վերաբերյալ նրա ընդհանուր ոչ ճիշտ կոնցեպցիայից: Նրա կարծիքով գերմանական *horig* և *leibeigen*, ռուսական *крепостной* և *зависимый*, բյուզանդական *colonus* կատեգորիայի գյուղացիները բոլորն էլ ճորտեր են: Տարբերությունն այն է, որ ճորտությունը մի ղեկարում մեղմ, մյուս ղեկարում խիստ է արտահայտված եղել: Դրանից էլ եզրակացնում է, որ «ճորտություն և ճորտ բառերը խիստ ճապաղ և առաձգական դադափարներ են»⁵⁰: Օրինակ, Մանանդյանը բյուզանդական կոլոնների մասին գրում է, որ նրանք «կապված էին հողին և չունեին տեղափոխման իրավունք», որ «նրանք իրավունք չեն ունեցել վարել որևէ պաշտոն, նույնիսկ ստորին կարգի»⁵¹, որ «կոլոնները կարող էին ընդունվել տեղական եկեղեցիների մեջ իրենց տերերի հաճությամբ»⁵²: Մեզ թվում է այս սահմանափա-

⁴⁸ Նույն տեղում, էջ 211:

⁴⁹ Վ. Մարկոսյան, Կապիտալ, հատ. 3, մաս 2, էջ 330:

⁵⁰ Հ. Մանանդյան, Քննական տեսություն հայ ժողովրդի պատմության, հատ. Բ, մաս Ա, էջ 368:

⁵¹ Նույն տեղում, էջ 379:

⁵² Նույն տեղում, էջ 372:

կումները, մանավանդ հողին կապված և տեղափոխման իրավունքից զուրկ լինելը, խոսում են այն մասին, որ կոլոններն անձնապես անազատ էին: Ինչպես հայտնի է, մինչև Կոստանդիանոսի 332 թ. էդիկտը կոլոնները շնայած կախման մեջ էին հողատերերից, բայց եթե ոչ փաստորեն, դոնե իրավակա-նորեն համարվում էին ազատ, տեղափոխության իրավունք ունեին և կապված չէին հողին, նրանց ազատ լինելու միակ ցուցանիշը հենց այդ վերջին հանգա-մանքն էր: Նույնպես հայտնի է, որ 332 թ. էդիկտով կոլոններին արգելվում էր մի կալվածից մի ուրիշ կալված փոխադրվել. այդ էդիկտի հիման վրա փա-խած կոլոններին շղթայակապ վերադարձնում էին նրան ամրացված կալվածը՝ նախկին տերերի մոտ: Այդ ժամանակից կոլոնները համարվում էին «հողի ստրուկներ», կալվածատերերն իրավունք չունեին իրենց հողերն օտարել առանց կոլոններին: Էնդելսը կոլոնների մասին գրում է՝ «Նրանք ստրուկ չէին, բայց ազատ էլ չէին համարվում. նրանք չէին կարող ազատների հետ ամուսնանալ, իսկ իրար մեջ կնքված ամուսնություններն օրինական չէին համարվում, այլ դիտվում էին, ինչպես ստրուկների ամուսնությունները, որպես լուկ կենակցու-թյուն: Նրանք միջնադարյան ճորտերի նախակարապետներն էին»⁵³: Մինչդեռ ակադ. Մանանդյանը գտնում է, որ «ճորտերի առաջին (մեղմ) տեսակին պատ-կանում էին, օրինակ, Բյուզանդական կայսրության կոլոնները, որոնք անձնա-պես ազատ էին, բայց կապված էին հողին և չունեին տեղափոխման իրա-վունք»: Իհարկե, կարելի է մտածել, որ կոլոններն ազատ էին ստրկությունից, բայց լինելով հողին ամրացած, նրանք ճորտեր էին: Բայց Մանանդյանի խոսքը ստրկության և ճորտության համեմատության մասին չէ, այլ ֆեոդա-լական արտադրանքների պայմաններում գոյություն ունեցող ճորտերի իրավական դրության: Որ Մանանդյանը նկատի ունի ոչ թե ստրկու-թյունից ազատ լինելու հանգամանքը, այդ պարզ ընդգծված է նրա բոլոր աշ-խատություններում, որտեղ այդ մասին խոսվում է. օրինակ, կոլոնների հետ միասին նա հիշատակում է նաև գերմանական *Höfing* և ռուսական *зависимые* դյուդացիներին: Իսկ այդ պայմաններում մենք դժվարանում ենք ֆեոդալիզմի ժամանակ պատկերացնել այնպիսի դյուդացիներ, որոնք հողին ամրացած ճոր-տեր էին և միաժամանակ անձնապես ազատ էին:

Այսպիսով, հին Հայաստանի շինականների՝ հողին ամրացած և գույք լի-նելու վերաբերյալ ակադ. Մանանդյանի կարծիքը բոլորովին ապացուցված չէ: Եթե նկատի ունենանք սկզբնաղբյուրների վրա կատարած հետազոտու-թյուններից Մանանդյանի արած մյուս եզրակացությունները և անընդունելի համարենք շինականների հողին ամրացած և ազնվական տերերի գույք լի-նելու վերաբերյալ նրա մեկնաբանությունները, ապա պետք է ենթադրել, որ հին Հայաստանի շինականները համապատասխանելիս պետք է լինեին ֆեո-դալիզմի պայմաններում գոյություն ունեցող տուրքապարտ «ազատ» գյու-դացիներին: Այդպիսի հարաբերությունները որոշ երկրներում հատուկ էին ֆեոդալիզմին ճիշտ այնպես, ինչպես ուրիշ երկրներում՝ ճորտային չարա-բերությունները:

⁵³ Յ. Է. Ե. Ե. Ե., *Ընտանիքի, մասնավոր սեփականության և պետության ծագումը*, 1953, էջ 210—211:

О СОЦИАЛЬНОМ ПОЛОЖЕНИИ СОСЛОВИЯ «ШИНАКАНОВ»
ДРЕВНЕЙ АРМЕНИИ

Проф. С. С. МАРКОСЯН

(Р е з ю м е)

Вопрос социального положения основного трудового населения древней Армении, так называемых «шинаканов», является одним из спорных в истории армянского народа. В источниках почти нет прямых указаний, дающих возможность хоть сколько-нибудь удовлетворительно разрешить этот вопрос. Историкам приходится делать заключения из отдельных общих выражений и отдельных слов, подчас имеющих разные значения, и потому научная интерпретация социально-экономических терминов армянских источников имеет важнейшее значение.

В этом отношении очень много сделано академиком Я. А. Манандяном. Из его исследований можно прийти к заключению, что земельный фонд древней Армении находился в распоряжении сельских общин по системе общинного пользования и передела общинных земель. Правящие сословия нахараров, «азатов» и духовенство получали продуктовую (натуральную) ренту. Отсутствовали барское хозяйство и барская запашка. «Шинаканы» не были лишены личных прав, имели собственные, приобретенные земли («ксакагин»), не были подвержены суду и полицейскому надзору землевладельцев, а судились общими судами. В отношении штрафов они находились в гораздо лучшем положении, чем средневековые английские и русские незакрепощенные крестьяне (сегл-ы и смерды). В феодальной Армении «шинаканы» принимались во внимание даже в политической жизни.

Наряду с этим акад. Я. Манандян, интерпретируя древнеармянских историков, приходит к заключению, что «шинаканы» были прикреплены к земле, составляли личное имущество правящих сословий и что в древней Армении наряду с рентой продуктами существовала и отработочная рента в виде русской барщины.

Автор данной статьи находит, что эти два ряда положений, выдвинутых акад. Манандяном, взаимно исключают друг друга, и, разбирая все основные доводы акад. Манандяна, развитые им в своих капитальных трудах («Заметки о положении шинаканов древней Армении в эпоху марзбанства», «Государственные налоги Армении в эпоху марзбанства», «Заметки о феоде и феодальном войске Парфии и Аршакидской Армении», «Феодализм в древней Армении» и «Критический обзор истории армянского народа», т. II, ч. I), приходит к заключению, что интерпретация текстов, приводимых акад. Манандяном в отношении прикрепления шинаканов к земле, как и наличия барщины в древней Армении, не вытекает из этих текстов и противоречит им.